

## HISTORIA DE ESPAÑA

### OPCIÓN A

1. **Define os seguintes conceptos** (extensión recomendada ata 3-4 liñas por concepto) (2 puntos, 0'50 por concepto)

-Antigo Réxime, caciquismo, Desastre de Annual, Brigadas Internacionais.

2. **Explica a seguinte cuestión** (extensión recomendada unha cara de folio - 25/30 liñas) (3 puntos):

Escolle e responde só unha destas dúas opcións:

a) Os Decretos de Nova Planta e os seus efectos.

b) A cuestión nacional no século XIX.

3. **Composición histórica** (5 puntos):

Os seguintes textos deben permitirche facer unha redacción sobre o movemento obreiro en España no século XIX. Tendo en conta os documentos e a súa contextualización, debes atender cando menos ás razóns das reivindicacións obreiras, á evolución das formas de organización dos traballadores desde as sociedades de socorros mutuos ata as organizacións de clase, ós poderes ós que tiveron que facer fronte e ós efectos das súas loitas.

**Doc. 1. En setembro de 1855, *El Eco de la Clase Obrera* publicaba a seguinte petición ás Cortes:**

“Señores Deputados das Cortes Constituíntes:

Hai anos que a nosa clase vai camiñando cara á súa ruína. Os salarios minguan... As crises industriais sucédense. Temos que (...) mandar ao taller ás nosas donas con prexuízo da educación dos nosos fillos, sacrificar a estes mesmos fillos a un traballo prematuro.

Pedímosvos unicamente o libre exercicio dun dereito: o dereito de ASOCIARNOS... Hoxe concédesenos só para favorecer nos casos de enfermidade ou de falta de traballo; concédasenos en adiante para opoñernos ás desmedidas esixencias dos donos dos talleres...”

**Doc. 2. Mensaxe enviado polas asociacións obreiras de Cataluña ó Terceiro Congreso da Asociación Internacional de Traballadores de Bruselas (1868)**

“Encadeadas despois de longo tempo por un poder despótico, as sociedades obreiras de España envían un saúdo cordial ós seus irmáns do resto de Europa. O momento presente non é moi favorable ás asociacións. Non obstante,... en Cataluña e en Andalucía as asociacións obreiras desenvólvense pouco a pouco... Os obreiros españois están dispostos a loitar cos seus irmáns contra esa formidable asociación do Exército, do Trono e do Altar, para establecer ao fin, sobre bases sólidas, a paz, a xustiza e o traballo”.

**Doc. 3. Lei de accidentes de traballo publicada na *Gaceta de Madrid* o mércores 31 de xaneiro de 1900.**

“A tódolos que a presente viran e entenderan, sabede: que as Cortes decretaron e Nós sancionamos o seguinte:

Artigo 1º. Para os efectos da presente lei, enténdese por accidente toda lesión corporal que o operario sufra con ocasión e a consecuencia do traballo que executa por conta allea.

Art. 2º. O patrón é responsable dos accidentes ocorridos aos seus operarios con motivo e no exercicio da súa profesión ou traballo que realicen.

Art. 4º. Os obreiros terán dereito a indemnización polos accidentes indicados no artigo 2º, que produzan unha incapacidade de traballo absoluta ou parcial, temporal ou perpetua.

Art. 5º. Se o accidente producise a morte do obreiro, o patrón queda obrigado a sufragar os gastos de enterro, non excedendo estes de 100 pesetas, e ademais a indemnizar á viúva, descendentes lexítimos menores de dez e seis anos e ascendentes”.

## **HISTORIA DE ESPAÑA**

### **OPCIÓN B**

**1. Define os seguintes conceptos** (extensión recomendada ata 3-4 liñas por concepto) (2 puntos, 0'50 por concepto)

-Catastro de Ensenada, desamortización, Semana Tráxica, Plataxunta.

**2. Explica a seguinte cuestión** (extensión recomendada unha cara de folio - 25/30 liñas) (3 puntos):

Escolle e responde só unha destas dúas opcións:

a) Os medios de difusión das ideas ilustradas en España.

b) A reforma agraria da II República.

**3. Composición histórica** (5 puntos):

Os seguintes textos deben permitirche facer unha redacción sobre a situación da muller na ditadura franquista. Tendo en conta os documentos e a súa contextualización, debes atender cando menos ó modelo de muller creado polo réxime, ós poderes que o promoveron, e ós instrumentos utilizados cara á súa implantación.

**Doc. 1. Artigo dirixido ás mulleres no Boletín Oficial do Obispado de Pamplona (1956):**

"Preparar un nacemento feliz ao neno que leva en si, é aí, amadas fillas, o obxecto da vosa profesión, o secreto da súa grandeza e da súa beleza.

É unha das esixencias fundamentais da recta orde moral, que ó uso dos dereitos conxugais corresponde a sincera aceptación interna do oficio e do deber da maternidade. Con esta ambición camiña a muller pola vía establecida polo Creador cara ó fin que Él asignou á súa criatura, facéndoa, co exercicio daquela función, participante da súa bondade, da súa sabedoría e da súa omnipotencia."

**Doc. 2. Código Civil (1958):**

Artigo 57. O marido ten que protexer a muller e esta tenlle que obedecer ao marido.

Artigo 58. A muller está obrigada a seguir o marido onde este fixe a súa residencia.

Artigo 59. O marido é o administrador único dos bens da sociedade conxugal.

**Doc. 3. Fragmento dun texto publicado na revista *Teresa. Revista para Todas las Mujeres*, publicada pola *Sección Femenina* (marzo de 1961):**

"Unha muller que teña que atender as faenas domésticas con toda regularidade, ten ocasión de facer tanta ximnasia como non o fará nunca, verdadeiramente, se traballase fora da súa casa. Soamente a limpeza e abrillantado dos pavimentos constitúe un exemplo eficazísimo, e se se pensa nos movementos que son necesarios para quitar o po dos sitios altos, limpar os cristais, sacudir os traxes, decatarse de que se realizan tantos movementos de cultura física que, aínda cando non teñen como finalidade a estética do corpo, son igualmente eficazísimos precisamente para este fin".